

MAIS INFORMACIÓN

Xulgado 1ª Instancia - Familia, nº 6

Rúa Viena s/n, Polígono de Fontiñas
15703 Santiago de Compostela

Deseño: manjias creativas | Impresión: Gráficas Garabal | D.L.:

MEDIACIÓN INTRAXUDICIAL

recursos para a igualdade



mediación (do lat. *mediatiōne*) f. **1.** Acción e efecto de mediar. **2.** Der. Forma de solución pacífica dos conflitos na que se propón unha opción.

MEDIACIÓN INTRA XUDICIAL

A mediación intraxudicial é un proceso breve que reduce a dolorosa carga emocional, asociada a todo proceso de ruptura.

Un equipo de profesionais, de recoñecida experiencia e capacidade, desenvolverá o proceso, atendendo aos principios de neutralidade, obxectividade, imparcialidade e confidencialidade.

Non implica dilación algunha, porque se realiza simultaneamente ao proceso xudicial, aproveitando os tempos mortos do citado proceso sen chegar a suspender o mesmo, agás que ambas partes o soliciten pola proximidade dun acordo.

OBXECTIVO

- Mellora as relacións futuras entre os protagonistas. En especial, naqueles casos nos que as dúas partes deberán continuar relacionándose e desenvolvendo, axeitadamente, as súas funcións parenterais.

- Incrementa o protagonismo dos proxenitores, dentro dun espírito de responsabilidade compartida e de igualdade entre eles, resolvendo as discrepancias mantidas respecto da súa situación de conflito familiar. Permite a toma das decisións máis axeitadas, referentes ás/aos súas/seus fillas/fillos e ao seu porvir, coa intervención dunha persoa mediadora.
- Favorece a aprendizaxe ou «coñecemento tácito» dos proxenitores de técnicas de solución de conflitos.

BENEFICIOS E VANTAXES

- É un proceso gratuito e, en todo caso, diminúe o custo económico e emocional da ruptura. De tres a oito sesións, de hora a hora e media de duración, pódese alcanzar un acordo duradeiro e mutuamente aceptado que só necesita ser ratificado xudicialmente. Evitando trámites procesuais e posibles incidentes xudiciais, co conseguinte custo económico e emocional.
- É máis flexible e creativo que o ríxido proceso xudicial, admitindo todo tipo de alternativas e respectando o interese superior dos menores e os principios de orde pública e deontoloxía profesional.
- Evita a xudicialización innecesaria dos conflitos e, sobre todo, caer nunha dinámica de crecente confrontación entre os proxenitores, de enquistamento de posicións e reduce o risco de que as/os menores se utilicen como moeda de cambio na negociación.

MEDIACIÓN INRAXUDICIAL

PROTOCOLO DE DERIVACIÓN

XUNTA SECTORIAL DE XUÍCES DE PRIMEIRA INSTANCIA

Santiago de Compostela, 12 de marzo de 2008

Constituída a Xunta Sectorial coa participación do Ilmo. Sr. Decano e os maxistrados titulares dos cinco xulgados de primeira instancia desta cidade; actúa como secretario o titular do xulgado de igual clase n.º 2; alcánzase o seguinte ACORDO:

Ante a intención da Subdirección Xeral de Familia (Secretaría Xeral de Igualdade da Vicepresidencia da Xunta de Galicia) de poñer en funcionamento un programa piloto de mediación intraxudicial familiar para o vindeiro ano xudicial e logo de observar os termos da proposta de implantación acordada pola Xunta Sectorial de Xuíces de Primeira Instancia de Santiago de Compostela do día 06-02-2007 (Equipo de Co-Mediación estable integrado por un avogado e un psicólogo designados mediante Convenio da CC.AA. cos seus respectivos colexios profesionais), parece oportuno concertar un protocolo de derivación que se achegue como anexo ao convenio que asine a CC.AA. con tales colexios profesionais implicados no equipo de co-mediación que se vai establecer, necesidade imposta pola intervención de varios xulgados de primeira instancia ao non existir un xulgado de familia de cara á fixación dunhas instrucións ou modelo de actuación común co obxecto de garantir unha maior eficacia e coordinación ao servizo que se vai instaurar.

Pois ben, tratando de aproveitar a experiencia práctica dos xulgados en que se implantaron sistemas de mediación intraxudicial familiar, logo de consultar coa maioría de xulgados de familia adscritos ao proxecto de mediación iniciado no seo do CXPX no ano 2006 (en concreto cos X.F. n.º 18 de Barcelona, X.F. n.º 29 de Madrid, X.F. n.º 5 de Málaga, e X.F. n.º 3 de Pamplona, quedando pendente contacto cos X.F. n.º 12 de Mallorca e X.F. n.º 7 de Sevilla) e utilizando igualmente como modelo as conclusións do último seminario do CXPX sobre mediación intraxudicial familiar como pautas máis recentes que foron consensuadas ata a data, valorando os resultados da experiencia práctica dos mencionados xulgados de familia, concértase por unanimidade o seguinte

PROTOCOLO DE DERIVACIÓN:

A) PRINCIPIOS:

Nas intervencións de mediación intraxudicial familiar hanse observar os seguintes principios:

1. Voluntariedade.
Respectarase en todo caso o principio de voluntariedade na aceptación do proceso de mediación.
A asistencia á sesión informativa é voluntaria, salvo resolución xudicial motivada ditada con intervención do Ministerio Fiscal, ao amparo do artigo 158 do Código civil.
2. Confidencialidade.
A información que se utilice nos procesos de mediación permanecerá reservada e unicamente se informará da consecución do acordo. No caso de que a mediación non continúe por desistir dela calquera das partes, unicamente se informará o Xuíz deste feito, que carecerá de toda incidencia no axuizamento posterior.
En todo caso, o mediador está obrigado a informar o Xuíz ou o Ministerio Fiscal dos datos que poidan revelar a existencia dunha ameaza para a vida ou a integridade física ou psíquica dunha persoa ou de feitos delituosos perseguibles de oficio.
3. Igualdade das partes.
Garantirase a plena igualdade e liberdade das partes, polo que a mediación se interromperá en canto se advirta a existencia de calquera indicio de violencia ou de intimidación que afecte algunha das partes ou calquera outra causa de quebra do anterior principio.
4. Homologación de acordos de orde pública.
O acordo acadado, para a súa eficacia, necesitará ser homologado polo tribunal, cando se refira a materias non dispoñibles, nas formas previstas legalmente nos artigos 774 e 777 da Lei de axuizamento civil.

B) FORMA DE DERIVAR A MEDIACIÓN INTRAXUDICIAL:

1. O XUÍZ, DE OFICIO OU POR PETICIÓN DO MINISTERIO FISCAL, derivará as partes a unha sesión informativa de mediación e sinalará para tal efecto día, hora e lugar determinado.
TAMÉN O SECRETARIO XUDICIAL poderá remitir sesión informativa nos procedementos de formación de inventario recollidos no artigo 808 da Lei de axuizamento civil ou naqueles outros nos que a lei lles atribúa competencias.
A FISCALÍA, NOS EXPEDIENTES PREVIOS DE MENORES OU INCAPACITACIÓNS E TUTELAS, TAMÉN PODERÁ REALIZAR AS DERIVACIÓNS.
2. O Xuíz valorará o MOMENTO axeitado PARA A DERIVACIÓN, respectando sempre que nese momento, ambas as partes estean debidamente constituídas como parte nos autos.
Con carácter xeral nos procesos matrimoniais, unha vez que comparecesen ambas as partes, aproveitaranse os tempos intermedios entre o sinalamento da vista e a súa celebración, sen prexuízo de que se solicite a suspensión cando esta sexa inevitable, efectuando polo tanto a derivación na providencia en que se teña por contestada a demanda e se sinale o xuízo.

A derivación efectuarase en sede de medidas provisionais ou provisionálissimas no auto que resolva estas ou na propia comparecencia prevista nos artigos 771 e 773 da Lei de axuizamento civil. O contido da resolución restrinxirase no primeiro caso ás medidas máis perentorias e urxentes para as partes.

En sede de execución de títulos xudiciais, a derivación efectuarase unha vez comparecidas e coñecidas as respectivas posicións das partes, tras a presentación do escrito que deduz a oposición á execución despachada.

3. A REMISIÓN Á SESIÓN INFORMATIVA pode facerse en todos os procedementos de familia, sen limitación apriorística dos temas que se van mediar.

Inclúense en tales supostos os procesos sobre capacidade das persoas, nos casos de discrepancia en orde á determinación da idoneidade duns ou outros parentes para a asunción de funcións tutelares (titor, curador, etc.) e sobre tal concreto e exclusivo aspecto.

4. Para CONSEGUIR A CITA INFORMATIVA arbitraranse os medios necesarios para garantir a inmediata citación dos interesados.

Instarase a creación de axendas únicas informáticas e, no seu defecto, arbitrarase a posibilidade de que o xulgado consiga a cita por teléfono ou fax, con carácter inmediato.

5. O XULGADO REMITIRÁ UN PROTOCOLO DE DERIVACIÓN AO EQUIPO DE MEDIACIÓN.

Nese protocolo facilitarase a información necesaria que, polo menos, deberá conter: identificación do xulgado, número de autos, tipo de procedemento, identificación dos participantes (datos de identidade, idade e teléfonos de contacto), número de fillos e idades, e se se suspendeu ou non o procedemento.

Unha vez aceptada a mediación, remitirase ao equipo mediador unha copia dos escritos e documentos obrantes en autos que soliciten.

C) SESIÓN INFORMATIVA E PROCESO DE MEDIACIÓN:

1. Considérase prioritario que a sesión informativa se leve a cabo preferentemente en sede xudicial, sen prexuízo de que o proceso de mediación, se se aceptar, se leve a cabo noutras dependencias.

2. Da sesión informativa, poden resultar varias posibilidades:

- a familia non asiste.
- a familia é informada e non acepta.
- a familia acepta e suspéndese o procedemento.
- a familia acepta a intervención mediadora pero non suspende de momento o curso do procedemento, aproveitando os tempos intermedios entre o acordo de remisión e a vista, sen prexuízo de que se solicite a suspensión cando esta sexa inevitable.

A SUSPENSIÓN haberá de instarse por ambas as partes, a través da súa respectiva representación procesual, nunca por petición tan só do mediador.

Considérase suficiente o prazo de suspensión previsto no artigo 19.4 da Lei de axuizamento civil, computado dende a suspensión efectiva e non dende o momento da derivación.

O equipo de mediación comunicaralle por fax ao xulgado se se acepta ou non o proceso de mediación.

3. Unha vez finalizado o proceso de mediación, o equipo de mediación comunicaralle ao xulgado o resultado do proceso de mediación intraxudicial.

4. CONSIDÉRASE axeitado QUE OS LETRADOS INTERVEÑAN NA SESIÓN INFORMATIVA; ESTA DEBERÁ CONSTAR DE DÚAS PARTES: unha primeira, coas partes e os seus letrados, co fin de que estes obteñan a información necesaria do proceso de mediación e da identidade dos mediadores, e unha segunda, exclusivamente cos interesados.

CONSIDÉRASE QUE OS LETRADOS NON DEBEN INTERVIR NO PROCESO DE MEDIACIÓN.

En todo caso, deberá ser o letrado quen presente o convenio regulador ou someta o acordo parcial á homologación do xulgado, sen que sexa necesario que os mediadores dean traslado do acordo ao xuíz con independencia do convenio regulador.

5. NON SE CONSIDERA NECESARIO QUE OS MENORES INTERVEÑAN NO PROCESO DE MEDIACIÓN, só deberán facelo a criterio do mediador, valorando en cada caso, as súas condicións de madureza e a utilidade de tal intervención.

D) INFRAESTRUTURA:

1. A OFICINA XUDICIAL encargarse da información, control administrativo, conexión co centro de mediación, facilitación de datos do expediente ao mediador e citación das partes.
2. O EQUIPO DE MEDIACIÓN debe realizar a sesión informativa no prazo máis curto posible (sen necesidade a priori de suspender o curso dos autos).
Considérase conveniente que os cidadáns xa saian do xulgado coa data, o lugar e a hora na que serán atendidos.
3. REVISIÓN DO FUNCIONAMENTO:
É conveniente fixar un período inicial de dous ou tres meses, tras o cal se fará unha análise do funcionamento, para corrixir disfuncións, e un período máximo anual, despois do cal se fará a análise da experiencia e se decidirá, se é o caso, a súa continuidade.

Comuníquese o presente acordo para os efectos oportunos ao Grupo de Traballo de Dereito de Familia e Menores do CXPX, á Sala de Goberno do TSX de Galicia, á Subdirección Xeral de Familia (Secretaría Xeral de Igualdade da Vicepresidencia da Xunta de Galicia) e aos colexios profesionais implicados.